

## ■ TRIBUNA POLITICA

# Visita en las 11 regiuns

DA BARBARA JANOM STEINER,  
CUSSEGLIERA GUVERNATIVA

**V**us As regurdais: Ils 23 da settember 2012 ha il pievel grischun acceptà cleramain la farmaziun dad indesch regiuns en il rom da la refurma dal territori ed ha approvà la revisiun parziala corrispondenta da la constituziun chantunala en tut las regiuns dal chantun. En consequenza d'in referendum èn las votantas ed ils votants vegnids clamads ils 30 da novembre 2014 anc ina giada a l'urna ed han acceptà cleramain er la legislaziun executiva.

Tuts dus cumbats da votaziun èn vegnids manads en moda cuntraversa ed emozionala. Tuttina hai allegrivlamain dà cleras decisiuns dal pievel. Apparentamain ha la concepziun persvadì. Ina concepziun che stat cumplainamain en il senn dal rinforzament da l'autonomia communalia.

**D**api il 1. da schaner 2016 èn las indesch novas regiuns activas sin plaun operativ. La legislaziun ha gî l'intenziun da stgaffir regiuns che pon ademplir lur incumbensa effizientamain e svelt, ch'en ablas da decider e d'agir e che resguardan ils basegnis da las abitantas e dals abitants. Co guarda quai ussa



dentant or en la pratica? Tge experientschas èn vegnidas fatgas cun la realisaziun? E tge craps da stgarpitsch eran en via u ston anc vegnir superads? Per mai èsi stà evident da metter qua in accent en mes segund onn presidial: En il decurs da quest onn vom jau a visitar tut las regiuns. Quai vegn jau a far en differenta moda e maniera, tut tenor la regiun. Il punct cuminaivel da tut las visitas è il barat d'experientschas en il rom d'ina conferenza da las presidentas e dals presidents. Ils 16 da mars ha gî lieu l'emprima visita en la regiun Malögia. La situaziun è particolarra, betg mo pervia da la trilinguitad che vegn tgirada, ma bain er pervia da las du-mondas spinusas che han stuì vegnir schiliadas u ston anc vegnir schiliadas en il rom da la dissoluziun dal circul d'Engiadina'ota per l'onn 2018, sco p. ex. con-

cernent il traffic public u la piazza aviatica da Samedan.

**J**au hai pudi ma persvader che la conferenza da las presidentas e dals presidents da Malögia funcziuna en moda irreproschabla. Er sche la chargia da laver da las presidentas communalas e dals presidents communals è en general crescida in pau è sa cumprovada la prescripcziun chantunala ch'ellas ed els hajan da prender las decisiuns en la regiun. Els èn lura er quels che ston communitgar a lur votantas e votants en las vischnancas las consequenzas finanzialas da lur decisiuns.

**J**au ma legrel da las ulte-riuras diesch scuntradas en las regiuns. En il barat direct cun las presidentas ed ils presidents èsi pussaivel per mai da vegnir a savair ils quitads e las miserias, ma er ils giavischs da nossas vischnancas. Er or da l'Engiadina'ota e da la Bregaglia hai jau dastgà prender cun mai l'ina u l'autra proposta en la regenza. Predominà han dentant l'engraziament e la stima vicendaivla per las prestaziuns che mintga plaun statal furnescha a favur da nossa populaziun. Quests segns duain esser per nus in impuls da cuntinuar cun la laver.



Barat en il museum engiadinal a San Murezzan.